

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N j E

po Prijavi namjere koncentracije između privrednog subjekta Voestalpine AG, Austrija i
privrednog subjekta Boehler-Uddelholm AG, Austrija

Sarajevo, septembar 2007. godine



Broj: 01-05-26-011-12-II/07
Sarajevo, 21.09.2007. godine

Na osnovu člana 25. stav (1) pod e) člana 42. stav (1) tačka d) u vezi sa čl. 12., 14., 16. i 18., te u skladu sa članom 24. stav (2) Zakona o konkurenciji («Službeni glasnik BiH», broj 48/05) i člana 193. stav (2) Zakona o upravnom postupku («Službeni glasnik BiH», broj 29/02), po Prijavi namjere koncentracije između privrednog subjekta Voestalpine AG Voestalpine-Strasse 1, 4020 Linz, Austrija, zastupanog po Branku Mariću advokatu, Mehmeda Spahe 24, 71000 Sarajevo, i privrednog subjekta Boehler-Uddelholm AG Modecenterstr. 14/A/3, A-1030 Beč, Austrija, zaprimljenu pod brojem: 01-05-26-011-11/07 dana 18.04.2007. godine, Konkurencijsko vijeće, na 50. (pedesetoj) sjednici održanoj dana 21.09.2007. godine, je donijelo

RJEŠENJE

1. Ocjenjuje se dopuštenom koncentracija koja će nastati na tržištu čelika i proizvoda od čelika u Bosni i Hercegovini kupovinom većine dionica privrednog subjekta Boehler-Uddelholm AG Modecenterstr. 14/A/3, A-1030 Beč, Austrija, od strane privrednog subjekta Voestalpine AG Voestalpine-Strasse 1, 4020 Linz, Austrija.
2. Ovo Rješenje o koncentraciji upisuje se u Registar koncentracija.
3. Ovo Rješenje je konačno i bit će objavljeno u Službenom glasniku BiH, službenim glasilima entiteta i Brčko Distrikta Bosne i Hercegovine.

O b r a z l o ž e n j e

Voestalpine AG Voestalpine-Strasse 1, 4020 Linz, Austrija, putem ovlaštenog punomoćnika advokata Branka Marića, iz Sarajeva (u daljem tekstu: podnosilac Prijave ili Voestalpine AG), je dostavilo Konkurencijskom vijeću Prijavu namjere koncentracije dana 18.04.2007. godine koja je dopunjena dana 04.05.2007. godine i dana 10.05.2007. godine u kojoj se navodi da podnosilac Prijave namjerava da kupi većinu dionica privrednog subjekta Boehler-Uddelholm AG Modecenterstr. 14/A/3, A-1030 Beč, Austrija (u daljem tekstu: Boehler-Uddelholm AG).

Kako Prijava, nakon pregledane prispjele dokumentacije nije bila uredna i kompletna, od strane Konkurencijskog vijeća je zatražena dopuna dana 22.05.2007. godine, nakon čega je ista dopunjena dopisima dana 30.05.2007. godine, dana 31.05.2007. godine, dana 15.06.2007. godine, dana 27.06.2007. godine i dana 18.07.2007. godine.

Nakon toga, Konkurencijsko vijeće je podnosiocu Prijave, dana 27.07.2007. godine broj 01-05-26-011-10-11/07, izdalo Potvrdu o urednoj i kompletnoj dokumentaciji, u smislu člana 30. stav (3) Zakona.

Prijava je proizašla kao obaveza, u smislu člana 14. stav (1) tačka a) Zakona, jer je ukupan ostvareni godišnji prihod privrednog subjekta Voestalpine AG i privrednog subjekta Boehler-Uddelholm AG na svjetskom tržištu iznosio preko 100.000.000,00 KM, po završnom računu za 2006. godinu (u godini koja je prethodila predmetnoj koncentraciji).

Konsolidovan prihod učesnika koncentracije na dan 31.12.2006. godine:

Tablica 1.

Konsolidovani prihod (KM)	Voestalpine AG	Boehler-Uddelholm AG
Svijet	(..)** ¹	(..)**
Bosna i Hercegovina	(..)**	(..)**

¹ (..)** - podaci predstavljaju poslovnu tajnu

Zahtjev za ocjenu predmetne koncentracije podnesen je Evropskoj komisiji, te nadležnim organima u Švicarskoj i SAD. Evropska komisija je dana 18.06. 2007. godine odobrila predmetnu koncentraciju. Nadležno tijelo za ocjenu koncentracije u Brazilu je također donijelo odobrenje namjeravane koncentracije.

Nadalje, zahtjev za ocjenu predmetne koncentracije podnesen je i nadležnim organima u Ukrajini, Turskoj, Južnoj Africi i Južnoj Koreji.

Analizirajući podatke iz Prijave, podatke koje posjeduje Konkurencijsko vijeće kao i ostalu dostavljenu dokumentaciju na osnovu koje je izvršena ocjena pozitivnih i negativnih efekata predmetne koncentracije, u smislu člana 17. Zakona, Konkurencijsko vijeće, primjenjujući odredbe Zakona, Odluke o načinu podnošenja prijave i kriterijima za ocjenu koncentracija privrednih subjekata («Službeni glasnik BiH», broj 95/06), te Odluke o utvrđivanju relevantnog tržišta («Službeni glasnik BiH», broj 18/06) je utvrdilo sljedeće:

I. Pravni osnov i pravni oblik koncentracije

Pravni osnov predmetne koncentracije predstavlja javna ponuda za otkup dionica koju je podnosilac Prijave objavio dana 26.04.2007. godine kojom će izvršiti preuzimanje svih dionica u slobodnom opticaju privrednog subjekta Boehler-Uddelholm AG sa ciljem da stekne više od 50% dionica sa pravom glasa. Naime, prije navedene javne ponude za otkup dionica Voestalpine AG je dana 10.04.2007. godine sačinilo Ugovor o prodaji dionica sa privrednim subjektom Boehler-Uddelholm Industrieholding GmbH AG o kupovini 100% dionica, a navedeni privredni subjekt je vlasnik 20,95% dionica Boehler-Uddelholm AG.

Na osnovu pomenutog Ugovora i javne ponude za otkup dionica kao pravnog osnova predmetne koncentracije Voestalpine AG će steći pravo vlasništva u obimu većem od 50% dionica.

Pravni oblik koncentracije, u smislu člana 12. stav (1) pod (b) Zakona, je stjecanje kontrole privrednog subjekta Voestalpine AG kupovinom većine dionica privrednog subjekta Boehler-Uddelholm AG.

2. Učesnici koncentracije

VOESTALPINE AG

Voestalpine AG Voestalpine-Strasse 1, 4020 Linz, Austrija je osnovno društvo - Voestalpine grupe upisano u registar Pokrajinskog suda Linz pod privrednim registarskim brojem FN 66209 t dana 10.12.1993. godine. Vlasničku strukturu čine austrijski investitori koji posjeduju 46% dionica društva, skoro 25% dionica je u vlasništvu sjevernoameričkih investitora dok vlasničku strukturu u iznosu od 17% čine dioničari iz Velike Britanije i Njemačke. Više od 10% dionica posjeduju zaposleni Voestalpine AG. Osnovna djelatnost Voestalpine AG je proizvodnja proizvoda od čelika. Grupa je organizovana na način da se dijeli na četiri tzv. divizije i to divizija čelika - proizvodnja proizvoda od čvrstog čelika kroz koju ostvaruje više od 51% ukupnog prihoda, divizija za sistem željeznica - proizvodnja komponenti za željeznice i druge slične proizvode, automobilska divizija - proizvodnja oklopa i tzv. bijelih komponenti i modela i profilform divizija -koja je fokusirana na valjane proizvode. Voestalpine AG je, također aktivan u direktnoj prodaji svojih proizvoda i posjeduje subsidijarna društva koja se bave distribucijom robe na malo u Austiji (Voestalpine Steel Service Center GmbH), Češkoj, Hrvatskoj (Veting Stahlhandel d.o.o. Varaždin), Poljskoj, Rumuniji i Bosni i Hercegovini dok trgovačke urede posjeduje u Mađarskoj, Slovačkoj i Sloveniji.

Dana 20. decembra 2006. godine Voestalpine AG je prodala 74,9% udjela u Voestalpine Stahlhandel GmbH poljskoj kompaniji Zlomrex S.A. Njegova subsidijarna društva su aktivna u distribuciji i direktnoj prodaji proizvoda od čelika. Voestalpine AG preko Stahlhandels grupe posjeduje 25,1% udjela u Voestalpine Stahlhandel GmbH, tako da ne ostvaruje odlučujuću kontrolu nad navedenim društvom i nema odlučujućeg uticaja na donošenje odluka u navedenom društvu. Konkurencijsko vijeće je predmetnu koncentraciju odobrilo svojim Rješenjem od 05.04.2007. godine, broj 01-05-26-024-9-II/06.

Supsidijarna društva kompanije Voestalpine AG u BiH

Voestalpine AG u Bosni i Hercegovini posjeduje supsidijarno društvo Veting voestalpine Stahlhandel d.o.o. Džemala Bijedića 160, 71000 Sarajevo i to indirektno jer je navedeno društvo u 100% vlasništvu Veting Stahlhandel d.o.o. Vilka Novaka 48K, 42000 Varaždin iz Hrvatske koje je supsidijarno društvo Voestalpine AG.

BOEHLER-UDDELHOLM AG

Boehler-Uddelholm AG Modecenterstr. 14/A/3, A-1030 Beč, Austrija je svjetski aktivno specijalizirano privredno društvo upisano u registar Trgovinskog suda u Beču pod privrednim registarskim brojem 193960 k dana 08.04.2000. godine. Osnovna djelatnost Boehler-Uddelholm AG je proizvodnja čelika koja je organizirana u četiri osnovne divizije: metali visokog kvaliteta, zavarivanje, precizne trake i specijalno kovani materijali. Boehler-Uddelholm AG grupa ostvaruje 69,2% ukupnog prihoda je od strane divizije metala visokih performansi, a posjeduje proizvodne jedinice u Austriji, Njemačkoj, Švedskoj, Brazilu, Belgiji, SAD, Meksiku, Italiji, Turskoj i Indoneziji. Dana 31.12.2006. godine dionički kapital Boehler-Uddelholm AG se sastojao od (...)** dionica i to 20,95% dionica se nalazi u vlasništvu Boehler-Uddelholm AG Industrieholding GmbH, dok se 79,05% dionica nalazi u slobodnom opticaju, pri čemu niti jedan dodatni dioničar nije stekao 5% niti više od 5% dionica Boehler-Uddelholm AG.

Supsidijarna društva kompanije Boehler-Uddelholm AG u BiH

Boehler-Uddelholm AG nema supsidijarnih društava u Bosni i Hercegovini, a sa svojim proizvodima prisutan je na tržištu BiH putem svog supsidijarnog društva Boehler International GmbH, Austrija.

3. Analiza relevantnog tržišta

Voestalpine AG svoje proizvode u Bosni i Hercegovini plasira na tri načina i to putem supsidijarnog društva Voestalpine Steel Service Center GmbH u Austriji putem kojeg prodaje svoje proizvode direktno kupcima u Bosni i Hercegovini na bazi narudžbi. Proizvodi privrednog subjekta Voestalpine AG na tržištu Bosne i Hercegovine prisutni su i preko društva Veting voestalpine Stahlhandel d.o.o. Sarajevo, a svoje kupce u BiH, nastanjene u blizini granice sa Republikom Hrvatskom neposredno snadbijeva i Veting Stahlhandel d.o.o. Varaždin.

Prodajni asortiman privrednog subjekta Voestalpine AG na tržištu Bosne i Hercegovine čine proizvodi od mrkog ravnog čelika srednjeg kvaliteta koji su na tržištu prisutni sa 10% tržišnog učešća, žice za oblikovanje koje zauzimaju manje od 5% ukupnog tržišnog učešća, dok na ostale proizvode od čelika koje prodaje ova kompanije u BiH putem svojih povezanih društava otpada manje od 1%.

Boehler-Uddeholm AG preko svog supsidijarnog društva Boehler International GmbH iz Austrije proizvode prodaje direktno na osnovu narudžbi kupaca iz Bosne i Hercegovine.

Na tržištu Bosne i Hercegovine prodajni asortiman Boehler-Uddelholm AG čini posebni čelik sa 37 prodanih tona u 2006. godini na osnovu čega njihovo tržišno učešće bilježi manje od 1%. Boehler-Uddelholm AG nema distributera niti predstavništva u BiH, a svoje proizvode u BiH prodaje preko svog supsidijarnog društva Boehler International GmbH sa sjedištem u Austriji čiji je većinski vlasnik Boehler-Uddeholm i to direktno na osnovu narudžbi kupaca iz Bosne i Hercegovine.

Glavni konkurenti učesnicima predmetne koncentracije na tržištu Bosne i Hercegovine čine sljedeći privredni subjekti: Mittal Steel, Intermerkur, LIM Products, BHR ex i Treasurv.

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Relevantno tržište proizvoda predmetne koncentracije predstavlja tržište prodaje i distribucije

proizvoda od čelika.

Relevantno tržište u geografskom smislu smatrat će se tržište Bosne i Hercegovine jer se prodaja i distribucija proizvoda učesnika predmetne koncentracije odvija na području cijele Bosne i Hercegovine.

Imajući u vidu navedeno Konkurencijsko vijeće je utvrdilo da je relevantno tržište predmetne koncentracije tržište prodaje i distribucije proizvoda od čelika na cijeloj teritoriji Bosne i Hercegovine.

4. Procjena koncentracije

Konkurencijsko vijeće je, nakon procjene i analize podataka i utvrđenih činjenica u postupku donošenja predmetnog Rješenja, ocijenilo da provedba predmetne koncentracije ne vodi horizontalnom preklapanju učesnika koncentracije na relevantnom tržištu, s obzirom da privredni subjekat Boehler-Uddelholm AG u Bosni i Hercegovini nema supsidijarnih društava iako svoje proizvode na tržištu BiH plasira u neznatnim količinama. U tom smislu može se zaključiti da će se tržišni udjeli privrednog subjekta Voestalpine AG neznatno promijeniti tako da navedena koncentracija neće proizvesti promjenu tržišnih pozicija na relevantnom tržištu.

Konkurencijsko vijeće je utvrdilo da koncentracija predmetnih privrednih subjekata ne spriječava, ograničava niti narušava tržišnu konkurenciju na relevantnom tržištu distribucije proizvoda od čelika u Bosni i Hercegovini te je odlučilo kao u dispozitivu ovog Rješenja.

Administrativna taksa

Na ovo Rješenje podnosilac Prijave, u skladu s članom 2. tarifni broj 107. stav (1) tačka d) 1) Odluke o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», broj 30/06), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

Pouka o pravnom lijeku

Protiv ovog Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja odnosno od dana njegovog objavljivanja.

Predsjednik

Sanja Božić